

Na osnovu člana 102. st. (1) i (3) Zakona o zrakoplovstvu Bosne i Hercegovine ("Službeni glasnik BiH", broj 39/09) i člana 17. Zakona o Vijeću ministara Bosne i Hercegovine ("Službeni glasnik BiH", br. 30/03, 42/03, 81/06, 76/07, 81/07, 94/07 i 24/08), na prijedlog Ministarstva komunikacija i prometa Bosne i Hercegovine, Vijeće ministara Bosne i Hercegovine na 101. sjednici, održanoj 15. oktobra 2009. godine, donijelo je

ODLUKU

O USPOSTAVLJANJU DRŽAVNOG KOMITETA SIGURNOSTI CIVILNOG ZRAKOPLOVSTVA BOSNE I HERCEGOVINE

Član 1. (Predmet odluke)

Ovom Odlukom uspostavlja se Državni komitet sigurnosti civilnog zrakoplovstva Bosne i Hercegovine (u daljnjem tekstu: Državni komitet) koji koordinira komunikaciju i saradnju među nadležnim tijelima Bosne i Hercegovine u cilju efikasne primjene mjera, radnji i postupaka zrakoplovne sigurnosti, preventivnim djelovanjem te djelovanjem u vanrednim i kriznim situacijama.

Član 2. (Cilj)

Svojim djelovanjem Državni komitet osigurava da Bosna i Hercegovina:

- a) ispunji međunarodne obaveze, koje je preuzela članstvom u Međunarodnoj organizaciji za civilno zrakoplovstvo (u daljnjem tekstu: ICAO), potpisivanjem Opće konvencije o civilnom zrakoplovstvu (u daljnjem tekstu: Čikago konvencija) i drugih međunarodnih konvencija i protokola;
- b) dosljedno primjenjuje ICAO standarde sigurnosti i preporučenu praksu, unaprijedi efikasnost i regularnost civilnog zračnog prometa na teritoriji i zračnom prostoru Bosne i Hercegovine;
- c) ispunji specifične obaveze iz domena sigurnost civilnog zrakoplovstva definirane u dokumentima Evropske konferencije za civilno zrakoplovstvo i regulativom Evropske komisije.

Član 3. (Sastav Državnog komiteta)

- (1) Državni komitet čine:
 - a) zamjenik ministra komunikacija i prometa Bosne i Hercegovine;
 - b) zamjenik ministra sigurnosti Bosne i Hercegovine;
 - c) zamjenik ministra odbrane Bosne i Hercegovine;
 - d) zamjenik ministra vanjskih poslova Bosne i Hercegovine;
 - e) zamjenik državnog tužioca Bosne i Hercegovine;

f) generalni direktor Direkcije za civilno zrakoplovstvo Bosne i Hercegovine (u daljnjem tekstu: BHDCA);

g) direktor Agencije za pružanje usluga u zračnoj plovidbi Bosne i Hercegovine;

h) direktor Granične policije Bosne i Hercegovine;

i) direktor Obavještajno sigurnosne agencije Bosne i Hercegovine;

j) direktor Državne agencije za istrage i zaštitu Bosne i Hercegovine.

(2) U slučaju potrebe za stručnom ekspertizom ili ako postoji drugi interes, u Državni komitet se angažiraju predstavnici aerodroma, zračnih operatora, organizacija, službi i agencija.

(3) U svojstvu promatrača, sjednicama Državnog komiteta prisustvuju predstavnici OHR-a, EUFOR-a i EUPM, tokom trajanja njihovih mandata u Bosni i Hercegovini.

Član 4.

(Način imenovanja članova Državnog komiteta)

(1) U roku od 15 dana od dana stupanja na snagu ove Odluke, rukovodioci institucija iz člana 3. ove Odluke dužni su Ministarstvu komunikacija i prometa Bosne i Hercegovine dostaviti prijedlog svog predstavnika u Državnom komitetu.

(2) Odluku o imenovanju članova Državnog komiteta donosi Vijeće ministara Bosne i Hercegovine, na prijedlog Ministarstva komunikacija i prometa Bosne i Hercegovine.

Član 5.

(Djelokrug rada Državnog komiteta)

Državni komitet u svom radu:

a) priprema Nacrt programa sigurnosti civilnog zrakoplovstva Bosne i Hercegovine, koji usvaja Vijeće ministara Bosne i Hercegovine, kao i planove, pravilnike, uputstva i procedure, koji su sastavni dio Programa;

b) razmatra i analizira provođenje sigurnosnih mjera, radnji i postupaka na aerodromima, na osnovu izvještaja o provedenim elementima kontrole kvaliteta sigurnosti od strane ovlaštenih inspektora ili pojedinačnih izvještaja bilo kojeg subjekta u sistemu sigurnosti civilnog zrakoplovstva u Bosni i Hercegovini i utvrđuje odgovarajuće mjere u vezi s tim;

c) analizira nivo opasnosti i odlučuje o primjeni dodatnih mjera sigurnosti, u cilju zaštite civilnog zrakoplovstva od akata nezakonitog ometanja;

d) rukovodi akcijama u vanrednim i kriznim situacijama izazvanim nezakonitim radnjama, u slučaju otmice zrakoplova i dr., na način utvrđen Planom za krizne situacije u Bosni i Hercegovini, koji je sastavni dio Programa sigurnosti civilnog zrakoplovstva Bosne i Hercegovine, usvojenog Odlukom o uspostavljanju Programa sigurnosti civilnog zrakoplovstva Bosne i Hercegovine ("Službeni glasnik BiH", broj 20/08);

e) obavlja i druge poslove od posebnog interesa za sigurnost civilnog zrakoplovstva u Bosni i Hercegovini.

Član 6.
(Organizacija i način rada Državnog komiteta)

- (1) Radom Državnog komiteta rukovodi predsjedavajući, koji saziva konstituirajuću sjednicu u roku od 45 dana od dana stupanja na snagu odluke o imenovanju predsjedavajućeg, zamjenika, sekretara i članova Državnog komiteta.
- (2) Državni komitet ima zamjenika predsjedavajućeg i sekretara.
- (3) Državni komitet održava redovne sastanke najmanje dva puta godišnje.
- (4) Vanredni sastanci se održavaju po potrebi, nakon prijema informacija o prijetnji ili ukoliko je usljed akata nezakonitog ometanja došlo do narušavanja ili ugrožavanja sigurnosti civilnog zrakoplovstva Bosne i Hercegovine, ili na zahtjev bilo koje institucije iz člana 3. stav (1) ove Odluke.
- (5) Tokom održavanja redovnih sastanaka funkciju predsjedavajućeg obavlja zamjenik ministra komunikacija i prometa Bosne i Hercegovine, a funkciju zamjenika predsjedavajućeg obavlja zamjenik ministra sigurnosti Bosne i Hercegovine.
- (6) Tokom održavanja vanrednih sastanaka, u vanrednim situacijama koje su izazvane aktima nezakonitog ometanja (otmica zrakoplova) funkciju predsjedavajućeg Državnog komiteta obavlja zamjenik ministra sigurnosti Bosne i Hercegovine, a funkciju zamjenika predsjedavajućeg obavlja zamjenik ministra komunikacija i prometa Bosne i Hercegovine.
- (7) Funkciju sekretara Državnog komiteta obavlja lice stručno za pitanja sigurnosti civilnog zrakoplovstva, koju predloži ministar komunikacija i prometa Bosne i Hercegovine.
- (8) Državni komitet donosi Poslovnik o radu u roku od tri mjeseca od dana stupanja na snagu ove Odluke.

Član 7.
(Identifikacione kartice)

- (1) Članovima Državnog komiteta se izdaju identifikacione kartice kojim se dokazuje članstvo u Državnom komitetu i omogućava pristup prostorijama aerodroma u kojem je smješten centar za krizne situacije, kao i pristup drugim prostorijama aerodroma u vanrednim situacijama.
- (2) Identifikacione kartice iz stava (1) ovog člana izdaje BHDCA.

Član 8.
(Izvještaj o radu)

O redovnim zasjedanjima Državni komitet izvještava Vijeće ministara Bosne i Hercegovine, a o vanrednim i kriznim situacijama izvještava Vijeće ministara Bosne i Hercegovine i Predsjedništvo Bosne i Hercegovine.

Član 9.
(Djelovanje ostalih subjekata)

Djelovanje Državnog komiteta ne ograničava druge subjekte nadležne za različite aspekte sigurnosti civilnog zrakoplovstva, da međusobno saraduju u cilju održavanja adekvatnog nivoa sigurnosti, provođenjem mjera, radnji i postupaka iz njihove nadležnosti, definiranih Programom sigurnosti civilnog zrakoplovstva Bosne i Hercegovine.

Član 10.
(Stavljanje Odluke van snage)

Stupanjem na snagu ove Odluke prestaje važiti Odluka o uspostavljanju Državnog komiteta sigurnosti civilnog zrakoplovstva Bosne i Hercegovine ("Službeni glasnik BiH", br. 61/07 i 25/09).

Član 11.
(Primjena Odluke)

Ova Odluka stupa na snagu danom donošenja i objavljuje se u "Službenom glasniku BiH".

VM broj 267 /09
15. oktobra 2009. godine
Sarajevo

Predsjedavajući
Vijeća ministara BiH
Dr. **Nikola Špirić**, s. r.